

Loji WtE Sungai Udang beroperasi 2029

Mohd Salman Hamat

SUNGAI UDANG - Melaka melakar satu lagi pencapaian menerusi pembinaan Loji Waste-to-Energy (WtE) Sungai Udang yang akan menjadi penanda aras penting dalam pembangunan fasiliti pengurusan sisa pepejal di Malaysia.

Ketua Menteri Datuk Seri Utama Ab Rauf Yusoh berkata, inisiatif itu amat penting kerana ia adalah satu bentuk inovasi, transformasi dan reformasi yang bakal mencorakkan sistem pengurusan pepejal nasional pada masa hadapan.

Katanya, Loji WtE Sungai Udang yang juga kemudahan kedua seumpamanya di negara ini dibangunkan di tapak seluas 3.96 hektar (9.8 ekar) itu melibatkan kos RM660 juta dengan jangkaan siap sepenuhnya dan memulakan operasi pada 2029.

"Loji WtE Sungai Udang mampu merawat sehingga 1,000 tan sisa pepejal setiap hari, sekali gus menjana 22 megawatt tenaga boleh baharu.

"Ini bermakna, selain daripada mengurangkan pelepasan karbon dioksida, pencemaran udara, bau dan air, loji ini secara langsung memberi manfaat kepada rakyat Melaka menerusi bekalan elektrik yang lebih stabil dan mencukupi untuk keperluan harian.

"Perubahan besar inilah yang sedang kita usahakan, satu transformasi daripada pendekatan konvensional ke-



AB Rauf bersama Kor Ming dan kenamaan melihat model 3D pembinaan Loji WtE Sungai Udang. Foto Afiq Mustaffa

pada pendekatan yang lebih progresif. Daripada melihat sisa sebagai beban, kepada mengangkatnya sebagai sumber yang bernilai," kata Ketua Menteri ketika berucap pada Majlis Pecah Tanah Projek Loji WtE Sungai Udang di tapak WtE Sungai Udang, di sini, 2 April lalu.

Hadir sama Menteri Perumahan dan Kerajaan Tempatan Nga Kor Ming; Speaker Dewan Undangan Negeri Melaka Datuk Wira Ibrahim Durum; Setiausaha Kerajaan Negeri Melaka Datuk Wira Azhar Arshad; Exco Kanan Perumahan, Kerajaan Tempatan, Saliran, Perubahan Iklim dan Pengurusan Bencana negeri Datuk Rais Yasin; bariisan Exco dan Timbalan Exco.

Yang turut hadir Ketua Setiausaha

Kementerian Perumahan dan Kerajaan Tempatan Datuk Wira Dr. M Noor Azman Taib; Ketua Pengarah Jabatan Pengurusan Sisa Pepejal Negara Dato' Ir. Ts. Gs. Dr. Mohd Azhar Abd Hamid; Ketua Pegawai Eksekutif Kumpulan Malakoff Corporation Berhad Syahrulizam Samsudin, Ketua-ketua Jabatan Negeri Melaka serta Persekutuan.

Dalam pada itu, Ketua Menteri turut mengumumkan berita gembira buat penduduk Taman Desa Bertam yang bakal menerima masjid baharu hasil sumbangan daripada Malakoff Corporation Berhad.

"Pembangunan masjid di Taman Desa Bertam ini sudah pasti akan memberi manfaat besar kepada komuniti setempat," kata Ketua Menteri.